

## საქართველოს გარემოს დაცვისა და ბუნებრივი რესურსების მინისტრის

ბრძანება №300

2007 წლის 29 მარტი

ქ. თბილისი

### ბორჯომ-ხარაგაულის ეროვნული პარკისა და ბორჯომის სახელმწიფო ნაკრძალის ადმინისტრაციაში შემავალი „ნემვის ალკვეთილის“ ფუნქციონირების დროებითი რეგულირების წესის“ დამტკიცების შესახებ

„დაცული ტერიტორიების სისტემის შესახებ“ საქართველოს კანონის მე-20 მუხლის მე-7 პუნქტის „ა“ ქვეპუნქტის მოთხოვნათა შესრულების მიზნით, ვბრძანებ:

1. დამტკიცდეს თანდართული ბორჯომ-ხარაგაულის ეროვნული პარკისა და ბორჯომის სახელმწიფო ნაკრძალის ადმინისტრაციაში შემავალი „ნემვის ალკვეთილის“ ფუნქციონირების დროებითი რეგულირების წესი.

2. ეს ბრძანება ამოქმედდეს გამოქვეყნებისთანავე.

#### დ. ტყეშელაშვილი

#### შეტანილი ცვლილებები:

1. საქართველოს გარემოს დაცვისა და ბუნებრივი რესურსების მინისტრის 2010 წლის 18 ნოემბრის ბრძანება №64-სსმIII, №65, 22.11.2010წ; მუხ.2171

2. ძალადაკარგულია - საქართველოს გარემოს დაცვის მინისტრის 2012 წლის 19 ივლისის ბრძანება №186 - ვებგვერდი, 25.07.2012წ.

### ბორჯომ-ხარაგაულის ეროვნული პარკისა და ბორჯომის სახელმწიფო ნაკრძალში შემავალი „ნემვის ალკვეთილის“ დროებითი რეგულირების წესი

#### მუხლი 1. ზოგადი დებულებანი

1. „დაცული ტერიტორიების სისტემის ჩამოყალიბებისა და ბორჯომ-ხარაგაულის ეროვნული პარკის შექმნის შესახებ“ საქართველოს რესპუბლიკის მინისტრთა კაბინეტის 1995 წლის 28 ივლისის №447 დადგენილების მე-4 პუნქტის შესაბამისად, დროებით საზღვრებში დამტკიცდა „ნემვის ალკვეთილი“ ბორჯომის სატყეო მეურნეობის ახალდაბის, რველისა და ნემვის სატყეოების ბაზაზე. ნემვის ალკვეთილის დაარსების მთავარი მიზანია კავკასიური სოჭის კორომებისა და ფოცხვერის დაცვა-შენარჩუნება.

2. ბორჯომ-ხარაგაულის ეროვნული პარკისა და ბორჯომის სახელმწიფო ნაკრძალში შემავალი ნემვის ალკვეთილის დროებითი რეგულირების წესი წარმოადგენს „დაცული ტერიტორიების სისტემის შესახებ“ საქართველოს კანონის მე-20 მუხლის მე-7 პუნქტით განსაზღვრულ დოკუმენტს, რომლის მოქმედების ვადა განისაზღვრება ნემვის ალკვეთილის მენეჯმენტის გეგმის დამტკიცებამდე და წარმოადგენს ნემვის ალკვეთილის დაშვებული და აკრძალული საქმიანობით განსაზღვრული და სამენეჯმენტო ქმედებებით დაგეგმილ დროებით სახელმძღვანელო დოკუმენტს.

#### მუხლი 2. ნემვის ალკვეთილის დროებითი რეგულირების წესების რეგულირების სფერო

ნემვის ალკვეთილის დროებითი რეგულირების წესები არეგულირებს ბორჯომ-ხარაგაულის ეროვნული პარკისა და ბორჯომის სახელმწიფო ნაკრძალის ადმინისტრაციისათვის ბორჯომის ადმინისტრაციული რაიონის საზღვრების ფარგლებში 8992 ჰექტარ ფართობზე ნემვის ალკვეთილში არსებული ბუნებრივი რესურსების დაცვისა და გამოყენების საკითხებს.

### **მუხლი 3. ნემვის ალკვეთილის დროებითი რეგულირების წესის ძირითადი მიზნები და ამოცანები**

1. დროებითი რეგულირების წესის ძირითადი მიზნებია:

ა) ნემვის ალკვეთილის ტერიტორიის ტერიტორიულ-ფუნქციონალური ორგანიზაციის, მასზე არსებული ბუნებრივი რესურსების დაცვის, ამ რესურსების გამოყენების, აგრეთვე, საქართველოს კანონმდებლობით დაშვებული სხვა საქმიანობის განვითარების საკითხების სამართლებრივი მოწესრიგების გზით უზრუნველყოს ნემვის ალკვეთილის დაფუძნება და ბორჯომ-ხარაგაულის ეროვნული პარკისა და ბორჯომის სახელმწიფო ნაკრძალის ადმინისტრაციისათვის სამართავი მექანიზმის ჩამოყალიბება;

ბ) ნემვის ალკვეთილში ბორჯომ-ხარაგაულის ეროვნული პარკის მეშვეობით ეკოტურიზმის, ეკოლოგიური განათლებისა და რეკრეაციის სფეროში შესაძლებლობათა ზრდისათვის ხელშეწყობა.

2. დროებითი რეგულირების წესის ძირითადი ამოცანებია:

ა) ხელი შეუწყოს ბუნებრივი პროცესების უწყვეტი განვითარების უზრუნველსაყოფად ნემვის ალკვეთილის ტერიტორიის ბიოლოგიური მრავალფეროვნებით გამორჩეული, ბუნებრივი და სახეცვლილი უბნების დაცვასა და აღდგენას;

ბ) უზრუნველყოს ნემვის ალკვეთილის ბუნებრივი ეკოსისტემების, ლანდშაფტების, ცხოველთა და მცენარეთა სამყაროს, განსაკუთრებით – საფრთხის წინაშე მყოფ მცენარეთა და ცხოველთა გენოფონდის დაცვა, აღდგენა და ბიოლოგიური მრავალფეროვნების შენარჩუნება;

გ) ხელი შეუწყოს ბუნებრივ და ისტორიულ-კულტურულ გარემოში რეკრეაციის, ტურიზმისა და სოფლის მეურნეობის მდგრადი განვითარებისათვის ხელსაყრელი პირობების შექმნას ნემვის ალკვეთილის ტერიტორიაზე;

დ) ნემვის ალკვეთილის ფარგლებში უზრუნველყოს მიწის, წყლის, ცხოველთა და მცენარეთა სამყაროს (მათ შორის, ტყეების) და სხვა ბუნებრივი რესურსების მოვლა, დაცვა, აღდგენა და ამ რესურსებით რაციონალური სარგებლობა; განათლებისა და მეცნიერული კვლევა-ძიებისათვის ხელსაყრელი პირობების შექმნა; ისტორიულ-კულტურული ლანდშაფტებისა და ძეგლების დაცვა; წყლის ობიექტების ბუნებრივი ბიოეკოლოგიური რეჟიმის დაცვა;

ე) უზრუნველყოს ნემვის ალკვეთილის მთავარი მიზნით განსაზღვრული კავკასიური სოჭის კორომების, ფოცხვერის საბინადრო გარემოს დაცვა, აღდგენა და შენარჩუნება და ამ მიზნით ნემვის ალკვეთილის ტერიტორიაზე ხელუხლებელი მონაკვეთების (უბნები) გამოყოფა.

### **მუხლი 4. ნემვის ალკვეთილის ტერიტორიის მდებარეობა**

1. ბორჯომ-ხარაგაულის ეროვნული პარკისა და ბორჯომის სახელმწიფო ნაკრძალში ნემვის ალკვეთილის ტერიტორია მოიცავს საქართველოს სატყეო მეურნეობის დეპარტამენტის ბორჯომ-ბაკურიანის სატყეო მეურნეობის გამგებლობაში არსებულ სახელმწიფო ტყის ფონდის მიწებს საერთო ფართობით 8992 ჰა, მათ შორის, ამავე სატყეო მეურნეობის სატყეოების (სატყეო უბნებისა) და კვარტლების მიხედვით:

ა) ნემვის სატყეო კვ. № 1 – 42 კვარტლის ჩათვლით, საერთო ფართობი 5922 ჰა;

ბ) ახალდაბის სატყეო კვ. № 10,11,15-34 ჩათვლით, საერთო ფართობით 2526 ჰა;

გ) რველის სატყეო კვ. № 14,15,21,22,23 ჩათვლით, საერთო ფართობი 544 ჰა.

2. ნემვის ალკვეთილის ტერიტორიის შიგნით მდებარეობს საზაფხულო დასახლება ნემვი, რომელიც ეკუთვნის ახალდაბის საკრებულოს.

### **მუხლი 5. ნემვის ალკვეთილის ტერიტორიის ტერიტორიულ-ფუნქციონალური ორგანიზაცია**

1. ნემვის ალკვეთილის ტერიტორიის ტერიტორიულ-ფუნქციონალური ორგანიზაცია ეფუძნება „დაცული ტერიტორიების სისტემის შესახებ“ საქართველოს კანონით დადგენილ დაცული ტერიტორიების ზონირებას, რომლის შესაბამისად დაცული ტერიტორიის თითოეული კატეგორიის კანონით დადგენილი საზღვრების ფარგლებში შეიძლება მოეწყოს (გამოიყოს) ამავე კანონით განსაზღვრული ტერიტორიულ-ფუნქციონალური ზონა/ზონები.

2. „დაცული ტერიტორიების სისტემის შესახებ“ საქართველოს კანონის მე-7 მუხლის პირველი პუნქტის შესაბამისად ალკვეთილში ცოცხალი ორგანიზმების, ველური სახეობების, სახეობათა ჯგუფების და არაორგანული ბუნების წარმონაქმნების შესანარჩუნებლად საჭირო ბუნებრივი

პირობების დასაცავად საჭიროა ადამიანის მხრიდან სპეციალური აღდგენითი და მოვლითი ღონისძიებები და შესაძლებელია მკაცრი კონტროლის პირობებში განახლებადი რესურსის მოხმარება.

3. მკაცრი კონტროლის პირობებში განახლებადი ბუნებრივი რესურსების მოხმარების დროს გათვალისწინებულ უნდა იქნეს ნემვის აღკვეთილის მთავარი მიზნის განხორციელებისათვის აუცილებელი ხელისშემწეობი პირობები.

### **მუხლი 6. ნემვის აღკვეთილის ტერიტორიის ზონირება**

ნემვის აღკვეთილის ტერიტორიაზე იქნება ერთი ტერიტორიულ-ფუნქციონალური ზონა – ბუნების მართვადი დაცვის ზონა. ბუნების მართვადი დაცვის ზონაში განისაზღვრება განსაკუთრებით დაცული (უბნები) ტერიტორიები, სადაც იკრძალება ტყის მერქნითი რესურსებით სარგებლობა.

### **მუხლი 7. ნემვის აღკვეთილის ტერიტორიის ბუნების მართვადი დაცვის ზონა**

1. ნემვის აღკვეთილის ტერიტორიის ბუნების მართვადი დაცვის ზონა „დაცული ტერიტორიების სისტემის შესახებ“ საქართველოს კანონის შესაბამისად ეწყობა ბუნებრივი გარემოს დაცვის, მოვლა-პატრონობისა და აღდგენის, აგრეთვე მანიპულაციური მეცნიერული კვლევის, ტურიზმისა და საგანმანათლებლო საქმიანობისათვის. ბუნების მართვადი დაცვის ზონის მოწყობის ძირითადი მიზანია აგრეთვე:

- ა) ნემვის აღკვეთილის ტერიტორიაზე ეკოლოგიური წონასწორობის შენარჩუნება;
- ბ) ნემვის აღკვეთილის ტერიტორიაზე არსებული ეკოსისტემებისა და მის ფარგლებში გავრცელებულ გარეულ ცხოველთა და ველურ მცენარეთა სახეობების კონსერვაცია და აღდგენა;
- გ) ნემვის აღკვეთილის ტერიტორიის ჰიდროლოგიური სისტემის დაცვა და მონიტორინგი; ტყის ეკოსისტემების დაცვა და აღდგენა.

2. ნემვის აღკვეთილის ტერიტორიაზე ბუნების მართვადი დაცვის ზონა მოეწყობა ნემვის აღკვეთილის ტერიტორიის საერთო ფართობს მიკუთვნებული სახელმწიფო ტყის ფონდის მიწებზე – საერთო ფართობით 8992 ჰექტარი.

3. ბუნების მართვადი დაცვის ზონაში აკრძალულია ყოველგვარი საქმიანობა, რომელიც არ არის დაშვებული ამ მუხლის მე-4 პუნქტით.

4. ბუნების მართვადი დაცვის ზონაში დაშვებულია მხოლოდ:

- ა) არამანიპულაციური და მანიპულაციური სამეცნიერო კვლევა;
- ბ) საგანმანათლებლო საქმიანობა;
- გ) ეკოტურიზმი;
- დ) აღდგენითი ღონისძიებების განხორციელება;
- ე) სტიქიური უბედურების, კატასტროფის, საგანგებო მდგომარეობისა და აღდგენითი სამუშაოების დროს, სამსახურებრივი მოვალეობის განხორციელების მიზნით, ავტომობილთა და საჰაერო სატრანსპორტო საშუალებებით შეზღუდული გადაადგილება;
- ვ) მონიტორინგის სამუშაოთა წარმოება;
- ზ) საკადასტრო სამუშაოთა განხორციელება;
- თ) ბუნების მართვადი დაცვის ზონის კანონმდებლობით განსაზღვრული დაცვის რეჟიმისათვის აუცილებელი ღონისძიებების განხორციელება (ბუნების მართვადი დაცვის ზონის ფიზიკური დაცვა);
- ი) უმოტორო ტრანსპორტით გადაადგილება;
- კ) ვიზიტორთა ყოფნა და გადაადგილება;
- ლ) მიმდებარე საკრებულოებში შემავალი დასახლებული პუნქტების მოსახლეობის საჭიროებისათვის სასოფლო-სამეურნეო სავარგულებით ტრადიციული სარგებლობა იმ უბნებზე, რომლებსაც „ბორჯომ-ბაკურიანის სატყეო მეურნეობის ტყის მეურნეობის ორგანიზაციისა და განვითარების პროექტის განხილვის შესახებ საქართველოს სატყეო მეურნეობის სახელმწიფო დეპარტამენტის ბორჯომ-ბაკურიანის სატყეო მეურნეობის ტყის მეურნეობის ორგანიზაციისა და განვითარების 1997-2007 წლების პერიოდისათვის შედგენილი პროექტით“ მინიჭებული აქვთ სასოფლო-სამეურნეო სავარგულის კატეგორია;

მ) საადრიცხო სამუშაოების განხორციელება.

### **მუხლი 8. ტყის რესურსებით სარგებლობა ნემვის ალკვეთილის ტერიტორიაზე**

1. ნემვის ალკვეთილში არსებულ სახელმწიფო ტყის ფონდის მიწებზე მიმდებარე საკრებულოებში შემავალი დასახლებული პუნქტების მოსახლეობის საჭიროებისათვის საქართველოს კანონმდებლობით დადგენილი წესით დაიშვება:

- ა) ტყის არამერქნული რესურსებით სარგებლობა;
- ბ) ტყის მერქნიანი მცენარეების პროდუქტებით სარგებლობა;
- გ) ხის მეორეხარისხოვანი მასალებით სარგებლობა;
- დ) სოციალური ჭრების შედეგად მიღებული მერქნით სარგებლობა.

2. ნემვის ალკვეთილში არსებულ მიწებზე (ტყით დაფარულ ფართობებზე) სანიტარიული ჭრის ჩატარებისას უპირატესად უნდა გაიცეს სტიქიით მოთხრილ-მოტეხილი, დაავადებული და ზეხმელი ხეები. ამასთან:

ა) სოციალური ჭრის შედეგად ტყიდან გამოზიდული მერქნის ყოველწლიური რაოდენობა არ უნდა აღემატებოდეს 3500 (სამი ათას ხუთას) კუბურ მეტრ საშუალო მერქანსა და 500 (ხუთასი) კუბურ მეტრ სამასალე მერქანს;

ბ) დაცულ უნდა იქნეს „ცხოველთა სამყაროს შესახებ“ საქართველოს კანონით დადგენილი წესები გარეულ ცხოველთა საბინადრო გარემოს, გამრავლების არელების, გადარჩენის სტაციების, სამიგრაციო და წყალთან მისასვლელი გზების და წყლის სასმელი ადგილების დაცვის თაობაზე;

გ) ნემვის ალკვეთილში იყოფა განსაკუთრებით დაცული მონაკვეთები (უბნები), სადაც იკრძალება სპეციალური ჭრის ჩატარება. განსაკუთრებით დაცული (უბნები) ტერიტორიები მოიცავს ნემვის ალკვეთილის 1578 ჰა ფართობს, სადაც შედის ნემვის ალკვეთილის დროებითი რეგულირების წესის მე-4 მუხლით განსაზღვრული ნემვის სატყეოს №16, 36, 37, 38, 39, 40, 41, 42, კვარტლები – საერთო ფართობი 1192 ჰა და ახალდაბის სატყეოს № 24, 30, 31 კვარტლები – საერთო ფართობი 386 ჰა.

3. გარდა ამ მუხლის მე-2 პუნქტის „გ“ ქვეპუნქტით განსაზღვრული ტერიტორიისა „ნემვის ალკვეთილში“ დაშვებულია „ტყითსარგებლობის ლიცენზიების გაცემის წესისა და პირობების შესახებ დებულების დამტკიცების თაობაზე“ საქართველოს მთავრობის 2005 წლის 11 აგვისტოს №132 დადგენილებით დამტკიცებული დებულების მე-2 მუხლის 31-ე პუნქტის „ა“, „ბ“, „გ“, „ე“ ქვეპუნქტებით განსაზღვრულ შემთხვევებში სპეციალური დანიშნულებით ტყითსარგებლობა და საქართველოს კანონმდებლობით დაშვებული სხვა საქმიანობა.

*საქართველოს გარემოს დაცვისა და ბუნებრივი რესურსების მინისტრის 2010 წლის 18 ნოემბრის ბრძანება №64-სსმIII, №65, 22.11.2010წ; მუხ.2171*

### **მუხლი 9. მიწათსარგებლობა ნემვის ალკვეთილის ტერიტორიაზე**

ნემვის ალკვეთილის ტერიტორიის საზღვრების ფარგლებში იკრძალება მიწის ნაკვეთის საკუთრებაში გადაცემა.

### **მუხლი 10. ცხოველთა სამყაროს დაცვა ნემვის ალკვეთილის ტერიტორიაზე**

1. ნემვის ალკვეთილის ტერიტორიაზე ცხოველთა სამყაროს დაცვა ხორციელდება განსაზღვრული რეჟიმის შესაბამისად – „ცხოველთა სამყაროს შესახებ“ საქართველოს კანონით გათვალისწინებულ ცხოველთა სამყაროს დაცვის მოთხოვნათა საფუძველზე.

2. ნემვის ალკვეთილის ტერიტორიის ბუნების მართვადი დაცვის ზონებში აკრძალულია ნადირობა და აგრეთვე ცხოველთა სამყაროს ობიექტებით სხვაგვარი სარგებლობა.

3. ნემვის ალკვეთილის ტერიტორიის ბუნების მართვადი დაცვის ზონაში სტიქიური უბედურებისა და კატასტროფის სალიკვიდაციო ღონისძიებათა განხორციელების ფარგლებში საფრთხის წინაშე მყოფი ცხოველების სახეობათა გადარჩენის, გენოფონდის რეზერვატის შექმნა ან ვეტერინარული მიზნით გარეული ცხოველების დაჭერა ხორციელდება „ცხოველთა სამყაროს შესახებ“ საქართველოს კანონის მე-19 მუხლის მე-3 პუნქტის შესაბამისად.

4. მკაცრი კონტროლის პირობებში დაშვებულია ლიმიტირებული სპორტული და სამოყვარულო თევზაობა.

## **მუხლი 11. დაშვებული საქმიანობის განვითარების ინტეგრალური პროგრამები**

1. „დაცული ტერიტორიების სისტემის შესახებ“ საქართველოს კანონის შესაბამისად ინტეგრალური განვითარების პროგრამით განისაზღვრება კანონით დადგენილი საზღვრების ფარგლებში დაშვებული საქმიანობის განვითარების შემდეგი ინტეგრალური პროგრამები:

- ა) დაცვის პროგრამა;
- ბ) ვიზიტორთა პროგრამა;
- გ) კვლევისა და მონიტორინგისა და კონსერვაციის პროგრამა;
- დ) ეკოლოგიური განათლების პროგრამა;
- ე) დამხმარე ზონის პროგრამა.

2. დაცვის პროგრამის მიზანია ნემვის აღკვეთილის ეკოლოგიური წონასწორობის მდგრადი შენარჩუნება. ნემვის აღკვეთილის ეფექტიანი კონტროლისა და დაცვისათვის აუცილებელია შესასვლელში საგუშაგოს აშენება, ავტომანქანით აღჭურვა, ასევე აღკვეთილის შიდა ტერიტორიის კონტროლისათვის საჭიროა ტერიტორიაზე აიგოს თავშესაფრები, რომლებსაც მცველები ღამის სათევად გამოიყენებენ. დაცვის პროგრამა მოიცავს:

ა) საზღვრების დემარკაცია – აღკვეთილის საზღვრების მარკირება აუცილებელია მიწის მფლობელობასთან დაკავშირებული შესაძლო კონფლიქტების თავიდან ასაცილებლად, კონტროლისა და დაცვის გასაძლიერებლად. კონფლიქტური მონაკვეთები დ. ახალდაბასა და სოფ. კორტანეთს ესაზღვრება. მარკირებისათვის გამოიყენება სხვადასხვა ნიშნები (საინფორმაციო დაფები, სასაზღვრო ბოძები და სხვა);

ბ) მცველთა თავშესაფრების მოწყობა მცველთა ერთოთახიანი თავშესაფრები კეთილმოეწყობა აუცილებელი ავეჯით და ღუმელით. გარეთ მოეწყობა საპირფარეშოები და წყალგაყვანილობა;

გ) ხერგილების მოწყობა და კონტროლი – ტერიტორიის კონტროლი და სხვა სახის საქმიანობა უნდა განხორციელდეს ფეხით, ცხენებით და ავტო-მოტო სატრანსპორტო საშუალებებით;

დ) აღკვეთილის ტერიტორიის დასუფთავება (მდ. ნემურას კალაპოტის ჩათვლით) – ეს საქმიანობა უნდა განხორციელდეს აღკვეთილის მცველებისა და დაქირავებული მუშახელის მიერ. ნაგავი გატანილ უნდა იქნეს აღკვეთილის გარეთ, სპეციალურად გამოყოფილ ნაგავსაყრელ ადგილას;

ე) საგუშაგოს მოწყობა – საგუშაგო დაიცავს და გააკონტროლებს აღკვეთილის მთავარ შესასვლელს. შენობა სათანადოდ აღიჭურვება (გენერატორით და სხვ.) და მოეწყობა 4 მცველისათვის. საგუშაგოს საცხოვრებელი ფართია 100 მ<sup>2</sup> (ორი საძინებელი, სამზარეულო, პატარა სამუშაო ოთახი და სააბაზანო). საგუშაგოზე იმორიგეებს 2 მცველი.

3. ვიზიტორთა პროგრამის მიზანია ნემვის აღკვეთილის ტერიტორიის რეკრეაციული რესურსების სრულად და ეფექტიანად გამოყენებისათვის ხელშემწყობი პირობების შექმნა.

4. კვლევისა და მონიტორინგის პროგრამის მიზანია სამეცნიერო კვლევითი და გარემოს მონიტორინგის სამუშაოთა კოორდინირებისა და ხელშემწყობის გზით ნემვის აღკვეთილის ტერიტორიის ბუნებრივი ეკოსისტემების მდგრადი დაცვისათვის საბაზისო სამეცნიერო ინფორმაციის მოპოვება. კვლევისა და მონიტორინგის პროგრამა მოიცავს:

ა) ნემვის აღკვეთილის ტერიტორიაზე ტყის შემქმნელი ძირითადი მერქნიანი მცენარეების სახეობათა ცვლის ბუნებრივი პროცესის, ნახანძრალეზზე ტყის ბუნებრივი და ხელოვნური განახლებისა და ტყის უბნებში არსებულ ეკოსისტემებში მიმდინარე პროცესების შესწავლას;

ბ) ანთროპოგენული ზემოქმედების შედეგად დეგრადირებული ადგილებისა და ხშირად გამოყენებადი მონაკვეთების ეკოლოგიური მდგომარეობის შეფასებასა და მათზე დაკვირვებას (მონიტორინგს);

გ) ნემვის აღკვეთილის ტერიტორიაზე შესაბამისი ინვესტიციების ფარგლებში ფლორისა და ფაუნის ინვენტარიზაციას;

დ) სატყეო პათოლოგიური გამოკვლევების და მონიტორინგის ჩატარებას;

ე) მუდმივი სანიმუშო ფართობების მოწყობა მონიტორინგის მიზნით;

ვ) ცხოველთა სამყაროს რიცხოვნობის დადგენის მიზნით, მარშურუტების შედგენას.

5. ეკოლოგიური განათლების პროგრამის მიზანია საინფორმაციო მონაცემთა ბაზის შექმნა ვიზიტორებისა და აგრეთვე ნემვის აღკვეთილის ტერიტორიის მიმდებარე ზონაში ეკოლოგიური განათლების დასაწერად. ეკოლოგიური განათლების პროგრამა მოიცავს:

ა) ნემვის ალკვეთილის პოპულარიზაციის, მისი მიზნებისა და ამოცანების წარმოსაჩენად ვიზიტორებისა და ადგილობრივი მოსახლეობისათვის აქტიური საგანმანათლებლო-შემეცნებითი ღონისძიებების განხორციელებას;

ბ) ნემვის ალკვეთილის ტერიტორიაზე დასაქმებულ მუშაკთა აქტიურ მონაწილეობას ნემვის ალკვეთილის ტერიტორიის მიმდებარე ზონაში გამართულ სხვადასხვა საზოგადოებრივ ღონისძიებებში.

6. დამხმარე ზონის პროგრამის მიზანია ნემვის ალკვეთილის ტერიტორიის მიმდებარე დასახლებულ პუნქტებში ნემვის ალკვეთილის დაცვის ამოცანებთან მისადაგებული მდგრადი ეკონომიკური განვითარების უზრუნველყოფა. უმთავრესი მიზანია ბიომრავალფეროვნების დაცვის ამოცანებისა და დამხმარე ზონის ეკონომიკური განვითარების ურთიერთშეხამება. ასევე შესაბამისი ინვესტიციების ფარგლებში მიმდებარე სოფლებისთვის საგანმანათლებლო დაწესებულებების, სათემო საბჭოების, კომუნალური ინფრასტრუქტურისა და გზების მოწესრიგება.

### **მუხლი 12. ისტორიისა და კულტურის ძეგლთა დაცვა და აღდგენა**

ისტორიისა და კულტურის ძეგლთა დაცვა და აღდგენა წარმოებს საქართველოს კანონმდებლობით დადგენილი წესის შესაბამისად.

### **მუხლი 13. ნემვის ალკვეთილის ტერიტორიის მართვა**

ნემვის ალკვეთილის ტერიტორიის მართვას ახორციელებს საქართველოს გარემოს დაცვისა და ბუნებრივი რესურსების სამინისტრო საჯარო სამართლის იურიდიული პირის „ბორჯომ-ხარაგაულის ეროვნული პარკისა და ბორჯომის სახელმწიფო ნაკრძალის ადმინისტრაციის“ მეშვეობით.

### **მუხლი 14. ადგილობრივი მოსახლეობისა და საზოგადოებრიობის წარმომადგენელთა მონაწილეობა ნემვის ალკვეთილის ტერიტორიის მართვასა და განვითარებაში**

ნემვის ალკვეთილის ტერიტორიის მართვასა და განვითარებაში ადგილობრივი მოსახლეობისა და საზოგადოებრიობის წარმომადგენელთა მონაწილეობის წესი განისაზღვრება „დაცული ტერიტორიების სისტემის შესახებ“ საქართველოს კანონის შესაბამისად.

### **მუხლი 15. პასუხისმგებლობა ნემვის ალკვეთილის ტერიტორიის დაცვისა და გამოყენების რეჟიმის დარღვევისათვის**

ნემვის ალკვეთილის ტერიტორიის დაცვისა და გამოყენების საქართველოს კანონმდებლობითა და ინტეგრალური განვითარების პროგრამით დადგენილი რეჟიმის დარღვევისათვის პასუხისმგებლობა დგება საქართველოს კანონმდებლობის შესაბამისად.

### **მუხლი 16. დროებითი რეგულირების წესის მოქმედების ვადა**

დროებითი რეგულირების წესის მოქმედების ვადა ძალაშია ნემვის ალკვეთილის ახალი სამენჯემენტო გეგმის საქართველოს კანონმდებლობით დადგენილი წესით დამტკიცებამდე.

### **მუხლი 17. „ნემვის ალკვეთილის“ ტერიტორიის ბორჯომ-ხარაგაულის ეროვნული პარკისა და ბორჯომის სახელმწიფო ნაკრძალის ადმინისტრაციის გამგებლობაში გადაცემა**

„ნემვის ალკვეთილის“ ტერიტორიის ბორჯომ-ხარაგაულის ეროვნული პარკისა და ბორჯომის სახელმწიფო ნაკრძალის ადმინისტრაციის გამგებლობაში გადაცემის მომენტად ითვლება ბორჯომ-ბაკურიანის სატყეო მეურნეობასთან გაფორმებული საბოლოო მიღება-ჩაბარების ოქმი.

### **მუხლი 18. განვითარების დაგეგმვა**

ნემვის ალკვეთილის განვითარების დაგეგმვა ხორციელდება „დაცული ტერიტორიების სისტემის შესახებ“ საქართველოს კანონის შესაბამისად და იგი საქართველოს დაცული ტერიტორიების დაგეგმვისა და ბორჯომ-ხარაგაულის ეროვნული პარკის განვითარების დაგეგმვის ერთიანი სისტემის ნაწილია.

**მუხლი 19. ჰიდრომეტეოროლოგიურ, გეოდეზიურ და კარტოგრაფიულ სამუშაოთა წარმოება**

ჰიდრომეტეოროლოგიური, გეოდეზიური და კარტოგრაფიული ღონისძიებების საქართველოს კანონმდებლობით დადგენილი წესით შესასრულებელი სამუშაოები უნდა აისახოს ნემვის მენეჯმენტის გეგმის მონიტორინგისა და კადასტრის ინტეგრალური განვითარების პროგრამებში.

**მუხლი 20. დროებითი რეგულირების წესში ცვლილებების და დამატებების შეტანა**

დროებითი რეგულირების წესში ცვლილებების და დამატებების შეტანა ხორციელდება საქართველოს კანონმდებლობით დადგენილი წესით.